

Waldy Simson a traha retrato di Betico Croes

ORANJESTAD - Tambe e artista polifacetico Waldy Simson ta impresiona di locual Gilberto (Betico) François Croes a haci den su bida como ser humano y como politico. Un punto absoluto culminante ademas ta su sacrificio cu a resulta cu Aruba a haya su status aparte.

Masha hopi inspira dor di un potret di Betico cu a sali den un edicion di e corant Rubiano Diario, Simson a cuminsa hinca diferente pinturanan den otro.

E pinturanan tabata forma preparacionnan pa e artista por traha un retrato di Betico haciendo uzo di papel den diferente sorto y colo.

Pa e por sigui traha na e plan di e retrato, na un dado momento Simson mester a busca yudansa cerca Juby Naar kende tin hopi conocimiento di bida cultural di Aruba. Pa Simson por a haya material cu tabata mas cla Juby a mand'e cerca su colega Aureen Werleman – Croes kende hunto cu su colega Miguel Garcia a logra di yuda Simson di berdad cu material perfecto.

Ora Simson a yega bek den su studio e por a sigui traha na locual a resulta den un retrato di Betico Croes den cua el a haci uzo di papel di colo preto, blanco, blauw, cora y geel, e colornan, menos e colo preto, cu tin den bandera

di Aruba.

E retrato tin tamaño 29 x 21 cm y lo wordo expone pa prome biaha riba e exposicion Waldy Simson Den UNOCA cu ta bay tuma lugá di dialuna 8 di April te cu diahuebs 2 di Mei venidero.

E exposicion tambe lo tin e meta pa crea fondo pa Simson por representa Aruba na Caribbean Festival for the Arts, Carifesta 2013, cu lo tuma lugá pronto na Surnam.

Simson ta dedica e retrato di Betico Croes cu el a traha den general na Aruba henter y particular na famia di Betico Croes, Juby Naar, Aureen Werleman – Croes y Miguel Garcia. □



Riba e foto por mira e artista Waldy Simson, hunto cu Aureen Werleman y Juby Naar.